



U-Solar 2.0 daripada UOB buka akses pembiayaan projek solar

Mac 22, 2023 @ 4:25pm



Wei Wei (duduk empat dari kiri) pada majlis pelancaran U-Solar 2.0 - Foto ihsan UOB Malaysia

KUALA LUMPUR: UOB Malaysia melancarkan U-Solar 2.0, pengembangan kepada program U-Solar Bank sedia ada, untuk memudahkan akses kepada pembiayaan mampan bagi kontraktor dan pemaju projek kejuruteraan, perolehan, pembinaan dan pentauliahan (EPCC) solar tempatan.

Menerusi kenyataan, UOB menjelaskan penambahan terbaru ini akan memperluas penawaran program kepada peserta industri di seluruh rantai nilai solar.

"Program ini akan memastikan aliran pembiayaan yang lancar dengan syarat pembayaran yang lebih baik untuk kontraktor dan pemaju solar memenuhi permintaan semakin meningkat untuk tenaga solar, di samping menghubungkan mereka kepada pembekal peralatan terkemuka di seluruh rantau ini," tambahnya.

Ketua Pegawai Eksekutif UOB Malaysia, Ng Wei Wei, berkata sejak pelancaran U-Solar, pihaknya menyediakan pembiayaan solar berjumlah hampir RM1 bilion kepada korporat, perusahaan kecil dan sederhana (PKS), serta pemilik rumah.

"Kami menjangkakan dapat meningkatkan pembiayaan mampan untuk tenaga solar sebanyak 50 peratus dalam tempoh 12 bulan akan datang, didorong tinjauan yang menggalakkan bagi industri tenaga solar serta dorongan kuat kerajaan terhadap tenaga boleh diperbaharui," katanya dalam kenyataan yang sama.

Beliau berkata, berlandaskan program yang diperluaskan ini, UOB Malaysia berharap dapat menyokong peserta ekosistem solar memanfaatkan peluang baharu selain mempercepat pembangunan sektor hijau negara.

Bank itu menambah, U-Solar 2.0 akan menyediakan syarat pembayaran lanjutan kepada kontraktor dan pemaju apabila mereka membeli daripada pembekal peralatan yang diluluskan oleh program itu.

Sebahagian daripada rangkaian penyelesaian program adalah pembiayaan perdagangan hijau, jelas UOB.

"Ini diperkenalkan bagi menangani isu aliran tunai dan jurang dalam modal kerja untuk pemaju dan kontraktor yang biasanya mempunyai tempoh belum terima yang lebih lama bagi projek tetapi mungkin menghadapi syarat pembayaran pendek daripada pembekal peralatan.

"Menerusi U-Solar 2.0, mereka dapat membiayai pembelian peralatan dan juga mengendali beberapa projek solar secara serentak, justeru mempercepat kadar penggunaan solar di rantau ini," tambahnya.

Menurut bank itu, U-Solar yang dilancarkan pada Oktober 2019 adalah platform pembiayaan tenaga solar bersepada pertama di Asia yang menjana pembangunan serta penggunaan tenaga boleh baharu di seluruh Asia Tenggara.

Sehingga 31 Disember 2022 U-Solar membantu memudahkan penjanaan hampir 307 jam gigawatt tenaga solar di Malaysia.

"Ini bermakna pengurangan 204,000 tan setara karbon dioksida dalam pelepasan gas rumah hijau, yang bersamaan dengan penanaman hampir 3.4 juta benih pokok selama 10 tahun dan mengeluarkan kira-kira 44,000 kereta dari jalan raya selama satu tahun," jelas UOB.

-BERNAMA